



**Grad Sarajevo**  
**City of Sarajevo**

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
**GRADSKO VIJEĆE**

**ODLUKA**  
**O NAČINU KORIŠTENJA, ODRŽAVANJA I ČUVANJA UREĐENIH VODOTOKA**  
**NA PODRUČJU GRADA SARAJEVA**  
**(Prijedlog)**

**Predlagač:** Gradonačelnica

**Obrađivač:** Služba za urbano planiranje,  
investicije, stambene i komunalne poslove

**Sarajevo, mart 2024. godine**

**Adresa:** Hamdije Kreševljakovića 3  
71 000 Sarajevo  
**Tel.:** +387 33 216 659  
**Fax:** +387 33 205 874  
**Email:** [gsgv@sarajevo.ba](mailto:gsgv@sarajevo.ba)  
**Web:** [gradskovijece.sarajevo.ba](http://gradskovijece.sarajevo.ba)



Na osnovu člana 9. stav (4) Zakona o vodama Kantona Sarajevo („Službene novine Kantona Sarajevo“, br. 18/10, 43/16 i 44/22) i člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23), Gradsko vijeće Grada Sarajeva, na \_\_\_ sjednici održanoj dana \_\_. \_\_. 2024. godine, donijelo je:

**(Prijedlog)**

**ODLUKU  
O NAČINU KORIŠTENJA, ODRŽAVANJA I ČUVANJA UREĐENIH VODOTOKA  
NA PODRUČJU GRADA SARAJEVA**

**DIO I – OSNOVNE ODREDBE**

**Član 1.**

**(Predmet Odluke)**

Ovom odlukom regulira se način korištenja i druga pitanja od značaja za održavanje i čuvanje zaštitnih vodnih objekata i uređenih korita u vlasništvu Grada Sarajeva (u daljnjem tekstu: Grad), uređenih vodotoka I. i II. kategorije na području Grada Sarajeva.

**Član 2.**

**(Jednakopravnost spolova)**

Gramatička terminologija korištenja muškog i ženskog roda u ovoj Odluci podrazumijeva uključivanje oba roda.

**DIO II – KORIŠTENJE, ODRŽAVANJA I ČUVANJA UREĐENIH VODOTOKA**

**POGLAVLJE I – VODNO DOBRO, JAVNO VODNO DOBRO**

**Član 3.**

**(Vodno dobro)**

- (1)** Vodno dobro definirano je u članu 7. Zakona o vodama („Službene novine Federacije BiH“, broj 70/06) (u daljnjem tekstu: Osnovni zakon) kao skup zemljišnih čestica koje obuhvataju:
  - a)** zemljište na kojem je površinska voda trajno ili povremeno prisutna i zbog toga se oblikuju posebni hidrološki, geomorfološki i biološki odnosi, koji određuju vodne i o vodi ovisne ekosustave;
  - b)** osnovno korito tekućih voda, uključujući otoke i obale do izrazite geomorfološke promjene;
  - c)** priobalni pojas širine 15 metara od granice obale (izrazite morfološke promjene) za površinske vode I. kategorije odnosno priobalni pojas širine 5 metara od granice obale (izrazite morfološke promjene) za površinske vode II. kategorije;
  - d)** zemljište potopljeno stajaćim vodama, uključujući obalu do najvišega zabilježenog vodostaja;
  - e)** napuštena riječna korita koje voda povremeno plavi, močvare i zemljište potopljeno vodom zbog zahvata u prostoru;
  - f)** uređeni inundacijski pojas;
  - g)** zemljište ispod i pored vodnih objekata iz članka 14. stav (1) tačka 1. Osnovnog zakona.
- (2)** Vodno dobro može biti u vlasništvu Federacije, kantona, grada, općine, pravne ili fizičke osobe.

- (3) U slučaju prodaje zemljišne čestice u vlasništvu pravne ili fizičke osobe koja pripada vodnom dobru, pravo preče kupovine ima Federacija, kanton, grad odnosno općina.

#### **Član 4.**

##### **(Određivanje granica vodnog dobra)**

- (1) Određivanje granice vodnog dobra za površinske vode II. Kategorije, određuje Ministarstvo privrede Kantona Sarajevo u skladu sa članom 6. stav (2) Zakona o vodama Kantona Sarajevo („Službene novine Kantona Sarajevo“, br. 18/10, 43/16 i 44/22) (u daljnjem tekstu: Kantonalni zakon).
- (2) Ograničenja za aktivnosti na vodnom dobru upisuju se u zemljišni katastar.

#### **Član 5.**

##### **(Zahvati na vodnom dobru)**

- (1) U skladu sa članom 12. Osnovnog zakona, na vodnom dobru nije dozvoljeno izvoditi zahvate, osim:
- a) gradnje objekata javne infrastrukture (putevi, željeznice, mostovi, gasovodi i sl.);
  - b) gradnje zaštitnih vodnih objekata;
  - c) zahvata koji se odnose na poboljšanje hidromorfoloških i bioloških karakteristika površinskih voda;
  - d) zahvata koji se odnose na zaštitu prirode;
  - e) gradnje objekata potrebnih za korištenje voda (objekti za zahvat i akumuliranje vode) i objekata za osiguranje plovidbe i zaštitu od utapanja na prirodnim kupalištima;
  - f) gradnje objekata namijenjenih zaštiti voda od zagađenja;
  - g) gradnje objekata namijenjenih za potrebe rada državnih organa, zaštitu i spašavanje ljudi, životinja ili imovine od prirodnih i drugih nesreća, te provođenje zadataka policije
- (2) Zahvati iz stava (1) ovoga člana podliježu uvjetima propisanim ovim zakonom i propisima o građenju.

#### **Član 6.**

##### **(Javno vodno dobro)**

- (1) Javno vodno dobro definirano je u skladu sa članom 9. Osnovnog zakona i čine ga zemljišne čestice iz člana 3. stav (1) ove odluke, koje su do dana stupanja na snagu Osnovnog zakona bile upisane u zemljišnim knjigama kao javno dobro, državno vlasništvo ili vlasništvo grada ili općine, odnosno koje su na temelju zakona postale državno vlasništvo.
- (2) Javnim vodnim dobrom smatraju se, sve do dokaza suprotnoga, i one zemljišne čestice iz člana 3. stav (1) ove odluke koje do dana stupanja na snagu Osnovnog zakona nisu bile upisane u zemljišne knjige, odnosno koje su upisane u zemljišne knjige, ali nitko nije naveden kao njihov vlasnik.
- (3) Javno vodno dobro definirano u stavu (1) i stavu (2) ovoga člana je dobro od općega interesa i u vlasništvu je Grada Sarajeva za sve površinske vode I. i II. kategorije uređenih vodotoka u smislu Osnovnog zakona, odnosno prema podacima o upisu vlasništva u zemljišnim knjigama, upisanim do dana stupanja na snagu Kantonalnog zakona.
- (4) Nadležnosti upravljanja javnim vodnim dobrom vrše organi vlasti, pravna lica i druge institucije, u obimu i na način propisan Osnovnim zakonom ili drugim aktima nadležnih tijela kojima je preneseno pravo upravljanja javnim vodnim dobrom, a Grad Sarajevo je nadležan za čuvanje, održavanje, korištenje i zaštitu uređenih vodotoka druge kategorije na području Grada Sarajeva, u skladu sa Zakonom.

## **Član 7.**

### **(Pripadnost vodnog dobra)**

- (1) Rješenjem Ministarstva privrede Kantona Sarajevo utvrđuje se pripadnost vodnoga dobra javnom vodnom dobru za površinske vode II. kategorije, prema članu 8. stav (1) Kantonalnog zakona.
- (2) Javno vodno dobro ne može biti predmet prometa, ali može, pod posebnim uslovima određenim Osnovnim zakonom ili na zakonu zasnovanom podzakonskom propisu, biti predmet ograničena prava korištenja u obliku zakupa.
- (3) Federalni ministar donio je propis o načinu i uvjetima ograničena prava korištenja javnoga vodnog dobra iz stava (1) ovoga člana, u skladu sa članom 8. stav (1) Osnovnog zakona.
- (4) Zemljišna čestica prestaje biti djelom javnog vodnog dobra ako se rješenjem ministra iz stava (1), odnosno iz stava (3) ovog člana utvrdi da čestica prestaje ispunjavati uslove javnog vodnog dobra.

## **POGLAVLJE II. VODNI OBJEKTI, KORIŠTENJE VODNIH OBJEKATA I UREĐENIH KORITA I UPRAVLJANJE VODAMA**

## **Član 8.**

### **(Zaštitni vodni objekti)**

- (1) Zaštitni vodni objekti iz člana 9. stav (1) Kantonalnog zakona su objekti koji pripadaju površinskim vodama II kategorije su nasipi, obaloutvrde, uređena korita vodotoka, odvodni kanali, obodni (lateralni) kanali za zaštitu od vanjskih voda, odvodni tuneli, brane s akumulacijama, ustave, retenzije, crpne postaje za obranu od poplava i drugi pripadajući objekti, kao i objekti za zaštitu od erozija i bujica;
- (2) Zaštitni vodni objekti iz stava (1) ovog člana koji pripadaju uređenim vodotocima II. kategorije i uređena korita u urbanim područjima na površinskim vodama I. kategorije u vlasništvu su Grada Sarajeva;
- (3) Grad je dužan obezbijediti materijalne i organizacijske uslove za održavanje zaštitnih vodnih objekata iz stava (1) ovog člana u funkcionalnom stanju, korištenje u skladu sa njihovom prirodom i namjenom te njihovo čuvanje od uništenja, oštećenja ili nenamjenskog korištenja.
- (4) Grad može pravo upravljanja i korištenja vodnih objekata iz stava (1) ovog člana prenijeti u nadležnost drugih organa vlasti, pravnog lica ili druge institucije u obimu i na način propisan Kantonalnim zakonom, odnosno odlukom Grada Sarajeva.

## **Član 9.**

### **(Korištenje vodnih objekata i uređenih korita)**

- (1) Vodni objekti i uređena korita na području Grada Sarajeva koriste se u skladu sa njihovom namjenom i ovom odlukom.
- (2) Svako nenamjensko korištenje vodnih objekata i uređenih korita koje ima za posljedicu promjenu kvaliteta vode i stvaranje oštećenja na uređenim koritima i obalama vodotoka, zakonski je kažnjivo.
- (3) Svako nenamjensko korištenje uređenih vodnih objekata, uređenih korita i priobalnog pojasa, suprotno odredbama ove odluke, prekršajno je kažnjivo.

## **Član 10.**

### **(Upravljanje vodama i nadležnosti)**

- (1) Upravljanje vodama čini skup odluka, aktivnosti i mjera čija je svrha održavanje, poboljšanje i ostvarivanje potrebnog i održivog režima voda na području grada Sarajeva

u skladu sa prirodnim uslovima, planom, potrebama i mogućnostima, a ostvaruje se, između ostaloga, uređenjem voda i vodotoka i zaštitom od štetnog djelovanja voda.

- (2) Nadležnost nad upravljanjem vodama na području Grada Sarajeva, u skladu sa Zakonom, imaju organi Federacije Bosne i Hercegovine, Kantona Sarajevo, odnosno općina u sastavu Kantona Sarajevo.

### **POGLAVLJE III. ZAŠTITA OD ŠTETNOG DJELOVANJA VODA I ODRŽAVANJE VODNIH OBJEKATA I UREĐENIH KORITA**

#### **Član 11.**

##### **(Zaštita od štetnog djelovanja voda)**

Zaštita uređenih vodotoka obuhvata:

- a) zaštitu i odbranu od poplava;
- b) zaštitu obala i dna korita od erozije i bujica;
- c) čišćenje i održavanje vodnih objekata i uređenih korita.

#### **Član 12.**

##### **(Održavanje uređenog korita)**

Održavanje uređenog korita podrazumijeva preduzimanje niza aktivnosti u cilju održavanja korita u funkcionalnom i urednom stanju, sanaciju nastalih oštećenja, kao i sprječavanje nastajanja novih oštećenja, a naročito:

- a) Redovno čišćenje korita uređenog zatvorenog i otvorenog korita od otpadaka i nanosnog materijala;
- b) Redovno održavanje urednim uređenu kamenu i betonsku obalu uređenog korita, a na uređenim travnatim kosinama košenje i krčenje šiblja;
- c) Redovno čišćenje i održavanje ulaznih građevina zatvorenih reguliranih dijelova korita i izlaznih građevina pritoka rijeke Miljacke;
- d) Uklanjanje riječnog nanosa;
- e) Redovne sanacije nastalih oštećenja na uređenom koritu;
- f) Hortikulturno uređenje obale i priobalnog pojasa u skladu sa planom hortikulturnog uređenja, kao i postavljanje zaštitnih ograda;
- g) Druge adekvatne radnje neophodne za održavanje uređenog korita u urednom i funkcionalnom stanju.

#### **Član 13.**

##### **(Zabrane)**

- (1) Zabranjuje se trajno ili privremeno odlaganje otpada u uređeni vodotok, ispuštanje otpadnih voda koje može uticati na kvalitet vode i imati štetne posljedice po ekosisteme i okoliš.
- (2) Na vodnom dobru i priobalnom zemljištu zabranjene su djelatnosti i zahvati u smislu općih zabrana definiranih članom 95. Osnovnog zakona.

#### **Član 14.**

##### **(Vodni katastar i evidencija Grada)**

Općine su dužne u skladu sa Osnovnim zakonom, nakon uređenja neuređenog vodotoka i pribavljanja upotrebne dozvole, obavijestiti Grad o poduzetim aktivnostima i dostaviti relevantnu dokumentaciju Agenciji za vodno područje rijeke Save.

## **POGLAVLJE IV – PLANIRANJE, FINANSIJSKA SREDSTVA I NADZOR**

### **Član 15.**

#### **(Plan održavanja vodnih objekata i uređenih korita u vlasništvu Grada)**

- (1) Trogodišnji plan čuvanja, održavanja, korištenja i zaštite uređenih vodotoka iz nadležnosti Grada je sastavni dio trogodišnjeg plana rada Grada koji donosi gradonačelnica u skladu sa Zakonom o razvojnom planiranju i upravljanju razvojem u FBiH.
- (2) Godišnji plan čuvanja, održavanja, korištenja i zaštite vodotoka donosi Gradsko vijeće u okviru Plana rada Grada Sarajeva koji gradonačelnica predlaže Gradskom vijeću u februaru za tekuću godinu, u skladu sa Zakonom o razvojnom planiranju i upravljanju razvojem u FBiH.
- (3) Finansiranje planiranih aktivnosti iz stava (1) i stava (2) ovog člana planira se u okviru dokumenta okvirnog budžeta Grada, odnosno godišnjeg budžeta Grada.
- (4) Investicije Grada iz stava (1) i stava (2) ovog člana, koje se odnose na kapitalna ulaganja u izgradnju, sanaciju ili rekonstrukciju zaštitnih vodnih objekata i uređenih korita, predlažu se u program javnih investicija Kantona Sarajevo, odnosno FBiH u skladu i u rokovima propisanim Zakonom o budžetima u FBiH i podzakonskim propisima donesenim na osnovu tog zakona.
- (5) Ovom odlukom tekuće održavanje, čišćenje i čuvanje vodnih objekata i uređenih korita u vlasništvu Grada, povjerava se Javnom preduzeću za upravljanje, zaštitu i održavanje objekata Grada Sarajeva i obavljanje komunalnih i drugih djelatnosti od javnog interesa Grada Sarajeva „SARAJEVO“ društvo sa ograničenom odgovornošću (u daljnjem tekstu JP „Sarajevo“ d.o.o.), u skladu sa Kantonalnim zakonom i članom 8. stav (4) ove odluke, a navedena prava i obaveze JP „Sarajevo“ d.o.o. teku od 01.01.2025. godine.

### **Član 16.**

#### **(Finansijska sredstva)**

Sredstva potrebna za realizaciju plana iz člana 15. ove odluke obezbjeđuju se iz:

- a) budžeta Grada Sarajeva;
- b) dijela namjenskih sredstava od vodne naknade koje prikuplja Kanton Sarajevo;
- c) budžeta Federacije BiH, Kantona Sarajevo i gradskih općina;
- d) drugih domaćih i međunarodnih izvora finansiranja.

### **Član 17.**

#### **(Nadzor)**

- (1) Upravni nadzor nad provođenjem ove odluke vrši Ministarstvo privrede Kantona Sarajevo.
- (2) Inspeksijski nadzor nad provođenjem ove odluke provodi, u skladu sa odredbama Zakona o vodama Kantona Sarajevo, kantonalna vodna inspekcija.
- (3) Praćenje stanja u oblasti koja je predmet odluke i iniciranje mjera za poboljšanje stanja prema nadležnim organima vrši gradonačelnica.

### **Član 18.**

#### **(Kaznene odredbe)**

Kaznene odredbe se primjenjuju u skladu sa Osnovnim i Kantonalnim zakonom.

### **DIO III – PRELAZNE I ZAVRŠNE ODREDBE**

#### **Član 19.**

##### **(Obaveze u prelaznom periodu)**

JP „Sarajevo“ d.o.o. izrađuje elaborat o ekonomskoj opravdanosti reorganizacije JP „Sarajevo“ d.o.o. u skladu sa članom 15. stav (5) ove odluke u roku od tri mjeseca od stupanja na snagu ove odluke.

#### **Član 20.**

##### **(Prestanak važenja ranijih propisa)**

Početak primjene ove odluke prestaje da važi Odluka o korištenju, održavanju i čuvanju uređenih korita i obala vodotoka na području Grada Sarajeva („Službene novine Kantona Sarajevo“, broj 2/07) i Odluka o korištenju, održavanju i čuvanju vodotoka na području Grada Sarajeva („Službene novine Kantona Sarajevo“, broj 4/16).

#### **Član 21.**

##### **(Započeti procesi)**

- (1) Postupci u kojima se odlučuje o zahtjevima za korištenju uređenih korita i obala vodotoka, započeti na temelju propisa koji je bio na snazi do dana početka primjene ove odluke, okončat će se po odredbama tog propisa.
- (2) Pravosnažna rješenja iz ove oblasti koja su izdata do momenta početka primjene ove Odluke, ostaju na snazi do isteka njihovog važenja.

#### **Član 22.**

##### **(Izmjene i dopune)**

Izmjene i dopune ove odluke vrše se na način i po postupku predviđenom za njeno donošenje.

#### **Član 23.**

##### **(Stupanje na snagu i početak primjene)**

Ova odluka stupa na snagu naredni dan od dana objavljivanja u „Službenim novinama Kantona Sarajevo“, a primjenjuje se od 01.01.2025. godine.

**PREDSJEDAVAJUĆI GRADSKOG VIJEĆA**

**Jasmin Ademović**

**Broj:**  
**Sarajevo, \_\_. \_\_.2024. godine**

## **O B R A Z L O Ž E N J E**

### **I PRAVNI OSNOV**

Član 9. stav (4) Zakona o vodama Kantona Sarajevo („Službene novine Kantona Sarajevo“, br. 18/10, 43/16 i 44/22) propisuje da Gradsko vijeće donosi odluku o načinu korištenja i drugim pitanjima od značaja za održavanje i čuvanje zaštitnih vodnih objekata koji su u vlasništvu Grada.

Pravni osnov za donošenje ove odluke sadržan je i u odredbama člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23) kojim je propisana nadležnost Gradskog vijeća Grada Sarajeva da donosi odluke, druge propise i opće akte i daje njihovo tumačenje.

### **II RAZLOZI DONOŠENJA**

Gradu Sarajevu je Zakonom o vodama FBiH („Službene novine Federacije BiH“, broj 70/06), odnosno Zakonom o vodama Kantona Sarajevo („Službene novine Kantona Sarajevo“, broj 18/10, 43/16 i 44/22), prenesena nadležnost nad upravljanjem uređenim vodotocima, odnosno obaveza zaštite, održavanja i čuvanja zaštitnih vodnih objekata i uređenih korita koje su ovim propisima dati u vlasništvo Grada (obaloutvrde, uređena korita i sl.).

Također, kantonalnim propisom definirana je obaveza Gradskog vijeća da donese odluku o načinu korištenja i druga pitanja od značaja za održavanje i čuvanje zaštitnih vodnih objekata. Obzirom na kompleksnost i važnost predmetne oblasti te neophodnost dodatnog uređenja pitanja koja nisu pobliže definirana propisima višeg reda, Grad Sarajevo je pristupio izradi ovog akta.

### **III OBRAZLOŽENJE PRAVNIH RJEŠENJA**

#### **DIO PRVI – OSNOVNE ODREDBE**

**Članom 1.** definiran je predmet Odluke.

**Članom 2.** osigurava se primjena jednakopravnosti spolova.

#### **DIO II – KORIŠTENJE, ODRŽAVANJA I ČUVANJA UREĐENIH VODOTOKA**

##### **POGLAVLJE I – VODNO DOBRO, JAVNO VODNO DOBRO**

**Članom 3.** definirano je vodno dobro u skladu sa članom 7. Zakona o vodama („Službene novine Federacije BiH“, broj 70/06).

U stavu (1) ovoga člana od tačke a) do tačke g) navedeno je šta se smatra vodnim dobrom.

Stav (2) definira da vodno dobro može biti u vlasništvu Federacije, kantona, grada, općine, pravne ili fizičke osobe.

U stavu (3) je predviđena mogućnost prodaje zemljišne čestice u vlasništvu pravne ili fizičke osobe koja pripada vodnom dobru i tko ima pravo preče kupovine.

**Član 4.** stav (1) definira određivanje granica vodnog dobra za površinske vode II. kategorije te propisuje da ove granice određuje Ministarstvo privrede Kantona Sarajevo u skladu sa članom 6. stav (2) Zakona o vodama Kantona Sarajevo („Službene novine Kantona Sarajevo“, br. 18/10, 43/16 i 44/22).

Stav (2) definira da se granice vodnog dobra upisuju u zemljišni katastar.



**Članom 5.** definiraju se dozvoljeni zahvati na vodnom dobru te se u stavu (1) poziva na član 12. Osnovnog zakona kojim su pobrojani dozvoljeni zahvati. Od tačke a) do tačke g) su tačno navedeni dozvoljeni zahvati na vodnom dobru.

**Članom 6.** definira se javno vodno dobro.

Stav (1) navodi da je javno vodno dobro definirano u skladu sa članom 9. Osnovnog zakona i da ga čine zemljišne čestice iz člana 3. stav (1) ove odluke, koje su do dana stupanja na snagu Osnovnog zakona bile upisane u zemljišnim knjigama kao javno dobro, državno vlasništvo ili vlasništvo grada ili općine, odnosno koje su na temelju zakona postale državno vlasništvo.

Stav (2) definira da se javnim vodnim dobrom smatraju, sve do dokaza suprotnoga, i one zemljišne čestice iz člana 3. stav (1) ove odluke koje do dana stupanja na snagu Osnovnog zakona nisu bile upisane u zemljišne knjige, odnosno koje su upisane u zemljišne knjige, ali nitko nije naveden kao njihov vlasnik.

Stavom (3) javno vodno dobro definirano u stavu (1) i (2) ovoga člana navodi se da je dobro od općega interesa i u vlasništvu je Grada Sarajeva za sve površinske vode II. kategorije uređenih vodotoka u smislu Osnovnog zakona, odnosno prema podacima o upisu vlasništva u zemljišnim knjigama upisanim do dana stupanja na snagu Kantonalnog zakona.

Stav (4) definira nadležnost upravljanja javnim vodnim dobrom, odnosno navodi da nadležnost imaju organi vlasti, pravna lica i druge institucije, u obimu i na način propisan Osnovnim zakonom ili drugim aktima nadležnih tijela kojima je preneseno pravo upravljanja javnim vodnim dobrom, a Grad Sarajevo je nadležan za čuvanje, održavanje, korištenje i zaštitu uređenih vodotoka druge kategorije na području Grada Sarajeva, u skladu sa Zakonom.

Opreza radi, treba imati u vidu: Visoki predstavnik u BiH Christian Schmidt donio je Odluku (akt broj 01/22) kojim je donesen Zakon o izmjenama i dopunama Zakona o privremenoj zabrani raspolaganja državnom imovinom BiH („Službene novine BiH“, br. 18/05, 29/06, 85/06, 32/07, 41/07, 74/07, 99/07, 58/08, 22/22) kojim se zabranjuje raspolaganje državnom imovinom.

**Član 7.** definira pripadnost vodnog dobra.

Stav (1) definira da se rješenjem Ministarstva privrede Kantona Sarajevo utvrđuje pripadnost vodnoga dobra javnom vodnom dobru za površinske vode II. kategorije, prema članu 8. stav (1) Kantonalnog zakona.

Stav (2) definira da javno vodno dobro ne može biti predmet prometa, ali može, pod posebnim uslovima određenim Osnovnim zakonom ili na zakonu zasnovanom podzakonskom propisu, biti predmet ograničena prava korištenja u obliku zakupa.

Stav (3) definira da je federalni ministar donio propis o načinu i uvjetima ograničena prava korištenja javnoga vodnog dobra iz stava (1) ovoga člana, u skladu sa članom 8. stav (1) Osnovnog zakona.

Stav (4) definira da zemljišna čestica prestaje biti djelom javnog vodnog dobra ako se rješenjem ministra iz stava (1), odnosno iz stava (3) ovog člana utvrdi da čestica prestaje ispunjavati uslove javnog vodnog dobra.

## **POGLAVLJE II – VODNI OBJEKTI, KORIŠTENJE VODNIH OBJEKATA I UPRAVLJANJE VODAMA**

**Član 8.** opisuje zaštitne vodne objekte.

(1) Zaštitni vodni objekti iz člana 9. stav (1) Kantonalnog zakona koji pripadaju površinskim vodama II kategorije su nasipi, obaloutvrde, uređena korita vodotoka, odvodni kanali, obodni (lateralni) kanali za zaštitu od vanjskih voda, odvodni tuneli, brane s akumulacijama, ustave, retenzije, crpne postaje za obranu od poplava i drugi pripadajući objekti, kao i objekti za zaštitu od erozija i bujica.

(2) Zaštitni vodni objekti iz stava (1) ovog člana koji pripadaju uređenim vodotocima II. kategorije i uređena korita u urbanim područjima na površinskim vodama I. kategorije u vlasništvu su Grada Sarajeva.

Ova odluka o upravljanju vodama na području Grada Sarajeva sastoji se od niza članova i stavova koji definiraju način, odgovornosti i mjere vezane za korištenje, zaštitu i održavanje vodenih objekata, uređenih korita i obala vodotoka.

**Član 9.** definira upravljanje vodama i nadležnosti.

Stav (1) definira upravljanje vodama kao skup aktivnosti usmjerenih na očuvanje, poboljšanje i održavanje prirodnih režima voda na području grada Sarajeva, uzimajući u obzir prirodne uslove, potrebe i mogućnosti. To se postiže reguliranjem voda i vodotoka te zaštitom od štetnog djelovanja voda.

Stav (2) navodi tko ima nadležnost za upravljanje vodama na području Grada Sarajeva, što obuhvata organe Federacije Bosne i Hercegovine, Kantona Sarajevo i općina unutar Kantona Sarajevo, u skladu sa važećim Zakonom.

**Član 10.** definira korištenje vodnih objekata i uređenih korita.

Stav (1) navodi da se vodni objekti i uređena korita koriste u skladu sa njihovom svrhom i odredbama ove odluke.

Stav (2) definira da nenamjensko korištenje vodnih objekata ili korita koje rezultira promjenom kvaliteta vode ili oštećenjem uređenih korita, predstavlja zakonski kažnjiv postupak.

Stav (3) navodi da suprotno odredbama ove odluke, nenamjensko korištenje vodnih objekata i uređenih korita predstavlja prekršajno je kažnjivo djelo.

### **POGLAVLJE III – ZAŠTITA OD ŠTETNOG DJELOVANJA VODA I ODRŽAVANJE VODNIH OBJEKATA I UREĐENIH KORITA**

**Član 11.** definira zaštitu od štetnog djelovanja voda koje uključuju obranu od poplava, zaštitu obala i korita od erozije i bujica, te čišćenje i održavanje vodnih objekata i uređenih korita.

**Član 12.** definira održavanje uređenog korita.

Stav (1) navodi da aktivnosti koje podrazumijevaju održavanja uređenog korita i od tačke a) do tačke g) naročito ističe određene aktivnosti.

**Član 13.** definira zabrane.

Stav (1) definira zabranu trajnog ili privremenog odlaganja otpada u uređeni vodotok te ispuštanja otpadnih voda koja mogu utjecati na kvalitet vode i okoliš.

Stav (2) definira da su na vodnom dobru i priobalnom zemljištu zabranjene djelatnosti i zahvati u smislu općih zabrana definiranih članom 95. Osnovnog zakona.

**Član 14.** definira vodni katastar i evidenciju Grada po ovom pitanju.

Propisuje se obaveza općina da obavijeste Grad o aktivnostima nakon uređenja vodotoka i dostave odgovarajuću dokumentaciju Agenciji za vodno područje rijeke Save u skladu sa Osnovnom zakonom.

### **POGLAVLJE IV – PLANIRANJE, FINANSIJSKA SREDSTVA I NADZOR**

**Član 15.** definira plan održavanja vodnih objekata i uređenih korita u vlasništvu Grada.

Stav (1) definira izradu trogodišnjeg plana čuvanja, održavanja, korištenja i zaštite uređenih vodotoka iz nadležnosti Grada koji je sastavni dio trogodišnjeg plana rada Grada koji donosi gradonačelnica u skladu sa Zakonom o razvojnom planiranju i upravljanju razvojem u FBiH.

Stav (2) definira izradu godišnjeg plana čuvanja, održavanja, korištenja i zaštite vodotoka koji donosi Gradsko vijeće u okviru Plana rada Grada Sarajeva koji gradonačelnica predlaže Gradskom vijeću u februaru za tekuću godinu, u skladu sa Zakonom o razvojnom planiranju i upravljanju razvojem u FBiH.

Stav (3) definira finansiranje planiranih aktivnosti iz stava (1) i stava (2) ovog člana, tako da se navedeno planira u okviru dokumenta okvirnog budžeta, odnosno godišnjeg budžeta Grada Sarajeva.

Stav (4) definira da se investicije Grada iz stava (1) i stava (2) ovog člana, koje se odnose na kapitalna ulaganja u izgradnju, sanaciju ili rekonstrukciju zaštitnih vodnih objekata i uređenih korita, predlažu za program javnih investicija, Kantona Sarajevo, odnosno Federacije BiH u skladu i u rokovima propisanim Zakonom o budžetima u FBiH i podzakonskim propisima donesenim na osnovu tog zakona.

Stav (5) definira da se ovom odlukom tekuće održavanje, čišćenje i čuvanje povjerava Javnom preduzeću za upravljanje, zaštitu i održavanje objekata Grada Sarajeva i obavljanje komunalnih i drugih djelatnosti od javnog interesa Grada Sarajeva „SARAJEVO“, društvo sa ograničenom odgovornošću, odnosno JP „Sarajevo“ d.o.o, u skladu sa Kantonalnim zakonom, a navedeno pravo i obaveza za JP „Sarajevo“ d.o.o. počinje se primjenjivati od 01.01.2025. godine. Javno preduzeće je i osnovano u svrhu upravljanja, zaštite i održavanja objekata Grada Sarajeva i obavljanje komunalnih i drugih djelatnosti od javnog interesa Grada Sarajeva.

**Član 16.** definira finansijska sredstva potrebna za provođenje ove odluke.

Navode se izvori sredstava za provođenje planova iz odluke, uključujući budžet Grada, namjenska sredstva te druge domaće i međunarodne izvore finansiranja.

**Član 17.** definira nadzor nad provođenjem ove odluke u skladu sa zakonom.

Stav (1) definira da upravni nadzor nad provođenjem ove odluke vrši Ministarstvo privrede Kantona Sarajevo.

Stav (2) definira da inspeksijski nadzor nad provođenjem ove odluke provodi, u skladu sa odredbama Zakona o vodama KS, kantonalna vodna inspekcija.

Stav (3) definira da praćenje stanja u oblasti predmetne odluke i iniciranje mjera za poboljšanje stanja prema nadležnim organima, vrši gradonačelnica.

**Član 18.** upućuje na kaznene odredbe u skladu sa Osnovnim i Kantonalnim zakonom.

### **DIO III – PRELAZNE I ZAVRŠNE ODREDBE**

**Član 19.** određuje obaveze u prelaznom periodu, odnosno obavezu izrade ekonomske opravdanosti reorganizacije JP „Sarajevo“ d.o.o., a zbog planiranog prijenosa poslova na održavanju i čuvanju u skladu sa ovom odlukom.

**Član 20.** uređuje prestanak važenja propisa koji su na snazi.

**Član 21.** uređuje započete procese.

Stav (1) određuje da za postupke u kojima se odlučuje o zahtjevima za korištenju uređenih korita i obala vodotoka, a koji su započeti na temelju propisa koji je bio na snazi do dana početka primjene ove odluke, odnosno do kraja 2024. godine, okončat će se po odredbama tog propisa.

Stav (2) uređuje da pravosnažna rješenja iz ove oblasti koja su izdata do momenta početka primjene ove odluke, ostaju na snazi do isteka njihovog važenja.

**Član 22.** uređuje postupak izmjena i dopuna ove odluke

**Član 23.** određuje datum stupanja na snagu i početak primjene Odluke te obavezu objave u „Službenim novinama Kantona Sarajevo“.

### **FINANSIJSKA SREDSTVA**

Finansijska sredstva za stvaranje uslova za početak primjene ove odluke planiraju se u Budžetu Grada Sarajeva za 2024. godinu iz dijela ostvarenog viška prihoda nad rashodima koje ostvari JP „Sarajevo“ d.o.o u 2023. godini i iz drugih raspoloživih izvora, a za provođenje ove odluke sredstva se planiraju u Budžetu Grada Sarajeva, u saradnji sa Kantonom Sarajevo (namjenska i druga budžetska sredstva) i gradskim općinama.

**IZVJEŠTAJ O PROVEDENOJ JAVNOJ RASPRAVI  
NA NACRT ODLUKE O NAČINU KORIŠTENJA, ODRŽAVANJA I ČUVANJA  
UREĐENIH VODOTOKA NA PODRUČJU GRADA SARAJEVA**

U skladu sa Zaključkom Gradskog vijeća Grada Sarajeva, broj: 01-GV-02-2007/23 od 27.12.2023. godine, provedena je javna rasprava na Nacrt Odluke o načinu korištenja, održavanja i čuvanja uređenih vodotoka na području Grada Sarajeva.

Pozivi za učešće u javnoj raspravi su, u skladu sa navedenim Zaključkom, upućeni sljedećim subjektima:

- Klubovima vijećnika u Gradskom vijeću Grada Sarajeva
- Agencija za vodno područje rijeke Save,
- Ministarstvo privrede Kantona Sarajevo,
- Ministarstvo komunalne privrede, infrastrukture, prostornog uređenja, građenja i zaštite okoliša,
- Općinama u sastavu Grada Sarajeva,
- Linkom na web stranici Grada Sarajeva svim zainteresovanim subjektima,
- Primjedbe, prijedlozi i sugestije iznesene na sjednici Gradskog vijeća i radnim tijelima, kao i zaključci Komisije za spomenike, smatraju se prilogom javne rasprave.

Javna rasprava je trajala 30 dana, odnosno do 15.02.2024. godine.

U javnoj raspravi učešće su uzeli sljedeći subjekti:

1. Agencija za vodno područje rijeke Save
2. Općina Stari Grad

**1. Agencija za vodno područje rijeke Save – sugestije i prijedlozi**

1. Član 1. – U vlasništvu Grada Sarajeva spadaju i uređena korita I. kategorije u urbanim područjima.
2. Član 4. stav (1) – Možda je bolji izraz organizuje ili provodi umjesto riječi „određuje“.
3. Član 4. stav (2) – ne granice, već ograničenja za aktivnosti na vodnom dobru.
4. Član 6. stav (3) – Opreza radi treba imati u vidu: Visoki predstavnik u BiH Christian Schmidt je donio Odluku (akt broj 01/22) kojim je donesen Zakon o izmjenama i dopunama Zakona o privremenoj zabrani raspolaganja državnom imovinom BiH („Službene novine BiH“, br. 18/05, 29/06, 85/06, 32/07, 41/07, 74/07, 99/07, 58/08, 22/22) kojim se zabranjuje raspolaganje državnom imovinom.
5. Član 6. stav (4) – i uređena korita na vodotocima I. kategorije.
6. Član 7. stav (3) – ovo je već urađeno, možete korigovati ovaj stav.
7. Član 8. stav (4) – ubacite još jedan stav o potrebi izrade općeg akta održavanja koji će propisati aktivnosti i sredstva potrebna za održavanje uređenih korita.

## **Odgovor predlagača:**

Cijeneci predloženo, prihvata se kako slijedi:

1. Prihvata se prijedlog te se dodaje kako je predloženo,
2. Ne prihvata se prijedlog, jer se riječ „određuje“ koristi u članu 6. Zakona o vodama Kantona Sarajevo,
3. Prihvata se prijedlog te se formuliše kako je predloženo,
4. Izneseno će se naći u obrazloženju predmetne odluke,
5. Prihvata se prijedlog te se dodaje kako je predloženo,
6. Prihvata se prijedlog te se u stavu (3) člana 7. riječ „donosi“ mijenja sa „donio“. Dalje se mijenja stav (4) člana 7. te izmijenjen glasi: „Zemljišna čestica prestaje biti djelom javnog vodnog dobra ako se rješenjem ministra iz stava (1), odnosno iz stava (3) ovog člana utvrdi da čestica prestaje ispunjavati uslove javnog vodnog dobra.“
7. Ne prihvata se iz razloga što je su u nastavku odluke propisane aktivnosti, nosioci i sredstva za potrebe održavanja uređenih korita koji de fakto predstavljaju opći akt održavanja.

## **2. Općina Stari Grad Sarajevo**

Vezano za utvrđeni Nacrt Odluke o načinu korištenja, održavanja i čuvanja uređenih vodotoka na području Grada Sarajeva, ovim putem ukazujemo na sljedeće:

Veliki broj manjih zatvorenih vodotoka npr. Čolin potok, Turbe potok, Čadordžin potok, Curin potok i dr. na području Općine Stari Grad Sarajevo, a vjerovatno i drugih gradskih općina, su istovremeno u funkciji oborinske odvodnje koja predstavlja komunalnu djelatnost zajedničke komunalne potrošnje i u ovom segmentu nadležnost komunalnog preduzeća koje održava kanalizacionu mrežu oborinske odvodnje i Grada Sarajeva nije jasno definirana.

Stoga smo stava da Grad Sarajevo, u saradnji sa komunalnim preduzećem i općinama treba uraditi evidentiranje i mapiranje zatvorenih reguliranih dijelova vodotoka II kategorije sa ulivnim građevinama na području Grada Sarajeva, te nakon toga jasno definirati nadležnost održavanja zatvorenih vodotoka.

Izradu evidencija i mapa treba predvidjeti Odlukom.

### **Stav predlagača:**

Cijeneci predloženo, stava smo kako slijedi:

Zakonom je jasno definirana nadležnost u pogledu upravljanja kolektorima za odvodnju oborinskih voda (KJKP „ViK“ d.o.o) i upravljanja uređenim vodotocima na području Grada Sarajeva (Grad Sarajevo).

Grad Sarajevo je evidentirao sve regulisane dijelove vodotoka (otvorene i zatvorene) putem Studije „Definiranje površinskih i zacijevljenih pritoka/vodotoka primarnih vodotoka na području grada Sarajevo“.